



友石山人遺稿叙

詩者聲之文也本於內而見於外者也仁義

正忠憤之感激以烈驕侈之言淫放僻之辭誕豈偶然

之故而已哉粵自唐虞聖神以敬畏一心發而為賡歌

慎念之語成周君臣以中正一理敷而為皇極敷言之

教下迨乎三百篇之制或泯乎正音或末響之流變

皆非有出於人心之外也戰國之間屈平氏以其忠憤

奮激之心一寓於離騷之作炎漢以降蘓武諸葛亮以

其忠直義勇之氣再變而為五言之體晉淵明得其冲


淡自然之趣唐少陵寓其忠君憂國之誠又豈有出於

是心之外哉洪武庚午余來閩郡庠生王偁奉其父友



石山人遺稿謁余請序其首余觀其詩毋慮百餘篇而詠於感慨者極忠愛之誠得於冲澹者適山林之趣已心異之而未知其詳及取其自決一首讀之凜然如秋霜烈日之嚴毅然如泰山巖、之象出處之分明死生之理得然後知其嘗任於勝朝而秉義於今日故凡其所作者皆心聲之應而非苟然眩葩組華者比且徵余向之所云者為益信也噫觀是篇者固可以求其心尤當以景其行則可以相忘於言語之外矣於余言何有哉因其請之勤而感其辭之寓遂書以歸之山人名翰字用文友石蓋其自號也時仲春初吉前進士監察御史廬陵陳仲述叙

友石山人遺稿



靈武

王翰

用文

五言古詩

送別劉子中二首

幽蘭抱貞姿結根巖石中猗、汎叢碧及此春露濃君子每見取衆艸羞與同當為王者香揚芳待清風撫琴起長嘆曲盡情未終
執手寒江濱慷慨難為別豈無楊柳枝零亂不堪折鴻雁西北來嗷、唳晴雪陽和忽已暮旅况轉淒切誰憐蘓子卿天涯持漢節

題南塘喬木圖

南塘有喬木，偃蹇盤空陰。始驚鸞鶴群，再聽蛟龍吟。歲暮霜雪繁，感觸一何深。明堂不見取，老大多苦心。春風田里間，榆林空成林。按圖為君歌，聊爾寫徽音。

題潮州鳶飛魚躍亭 在郡學東

虛亭倚危磯，蒼莽澹無跡。幽人時往來，濯足坐苔石。芰荷露涓々，蒲葦風淅々。物性機盡忘，上下皆自適。遙峰啟空翠，落日洞深碧。悠然一舒嘯，造化亘今昔。聖門竟淵邃，世路何逼仄。遐哉古人心，日暮生相憶。

途中

萬物皆有託，我生獨無家。蔓草野多露，眇々天之涯。親戚不在旁，更與奴僕賒。落日下長坂，悲風捲驚沙。林依

避猛虺，郊行畏長蛇。封狐逐野鼠，踉蹌當吾車。村墟四五聚，索莫集昏鴉。方投異鄉迹，又悲遠城茄。撫劍向夜起，中心鬱如麻。微軀烏足惜，天道良可嗟。雲漢念車阻，道路日已遐。去々復何極，為君惜年華。

送鎖子堅北上

亂象既無已，中心恒不夷。翩々南林鳥，厲翮無所依。念子將焉如，慷慨與我辭。西北有名將，世秉仁義麾。壯哉國士心，嘉會良在茲。江漢有舟楫，梁楚多旌旗。時焉不我與，言念渴與飢。明良際昌運，允稱平生懷。

與和仲古心飲酒分韻得詩字

淵明歸去時，不作兒女悲。視世如浮雲，出處得所宜。有

酒但歡飲戚：欲奚為斯人不可見載歌停雲詩

題棘石圖

烈風號中林極目盡荆棘離：寒月秋莽：古原夕冥
鴻振高融鷓鴣翳深跡奈此貞固姿蒼茫更秋色

友漁樵者詩為林伯景賦

至道久湮蕪浮生自勞苦鷓鴣甘鼠帶鸞鳳畏羅罟伊
人秉幽志夙昔陋珪組顧此山水間悠然笑容與短笛
入空林方舟向溪渚白雲時滿襟清漪或盈屨長嘯涼
風生徘徊新月吐行歌即宇宙醉臥無今古何由升杳
冥聊復謝城阻

題醉道士圖

楚澤多荆榛崑崙植瑤草化工運神機何物為醜好形
骸俱已忘希夷即為寶飄然來丹丘相逢過蓬島簪裳
一邂逅壺觴恣傾倒顧爾此日醇沆予百年抱同醉無
所知後此天地老

寫望雲圖寄溫陵劉子中

開牕見停雲美人別經載以茲一時意聊寄千里珮暖
暖春復深悠々歲云邁遲爾浩蕩心空山日相待

題菊

我憶故園時統籬種佳菊交葉長青葱餘英吐芳馥別
來二十載架々抱幽獨豈無桃李顏歲晚同草木及茲
覩餘芳使我淚盈掬離披已欲摧瀟洒猶在目雨露豈

所偏歲月不可復歸去來南山餐英坐空谷

和鄉友程民同會龍山留別韻

相思樂未終憂心亦何苦
翩翾鸞雀羣牢落麋鹿伍
緬懷駕輅車伊昔事戎府
王事多險艱跋涉幾風雨
看劍思躍龍登壟氣摧席
奈何向中道山川竟修阻
及茲展良覲澄秋碧江訢
雲山寄徜徉煙蘿暫容與
相投既不厭感慨獨懷古
長風起疎林寒色落芳渚
廣筵促鳴鶻泠然奏飛雨
雲霄浩無涯去但凝佇

龍山月夜飲酒分韻得樹字

薄暮清興嘉涼風集高樹
須臾明月生清光在樽俎
池空河影涼石冷苔色古
列坐當前墀杯行不煩舉
野庖

具山蔬稚子薦雞黍
晴峰餘靄收密竹殘露溼
驚鵲翻夜巢流螢墮前戶
良時念睽離觸物感所寓
坐待河影流疎鐘遶林曙

秋懷

懸門扶桑孤丈夫四方績
奈何中險艱零落苦相失
涼風天際來庭草淒以碧
嗷雙飛鴻宵征度寥閭
物性既如此予茲念何適
寒聲在衣中心煩百憂集
美人隔天涯佳期阻良夕
鼎湖詎可招巫咸已難即
孤憤不自聊長歌振巖石

月夜坐悠然軒有懷

明月照我懷閑窓共幽賞
泠泠萬籟秋靜夜發清響
山

川日修阻之子獨云往長歌耿不寐相思逖遐想

題溪山春晚圖

好山凌遠空初日散晴旭繁花點殷紅柔條媚新綠游
魚戀芳藻鳴鳥出深谷物情適初性一覽咸所觸寄謝
桃源人從茲仰芳躅

雪林為柏上人賦

朔風生沍寒瓊瑤徧山川日夕天雨花蒼然祇樹園大
千開淨域一髮無垢氛熱惱頓消息超然謝塵喧靈臺
澹明徹庶極真空源

七言古詩

輓迭漳州

黑雲壓城天柱折長烽夜照孤臣節劍血飛丹氣奪虹
銀章觸手紛如雪丈夫顧義不顧死泰華可摧川可竭
蕉黃荔丹酒滿壺千載漳人醉嗚咽

輓柏僉院

柏君挺々英雄姿出佐薇省丁時危愁聞西澗已瓦解
江南民命猶懸絲樓船一旦下江水殺氣兵氛壓城壘
大臣夙駕思棄城戰士魂消將心死臣雖力困肝胆存
臣當殺身思報恩誓將一木支顏厦肯豎降幟登轅門
人生恩愛豈不顧詎忍貪生負天子半空煙漲樓宇紅
盡室魂飛劍光紫嗚呼氣分光嶽臣道衰賣降授節紛
陸離魏々廊廟已如此扶持世教非公誰扶持世教非

公誰

昔在潮陽我欲死宗嗣如絲我無子彼時我死作忠臣
覆祀絕宗良可恥今年辟書親到門丁男屋下三人存
寸刃在手顧不惜一死却了君親恩

五言律詩

送陳同僉

馬首出城東將軍膽氣雄旌旗明苦日笳吹動悲風早
雪三邊恨寧誇百戰功相期春草色處：凱歌同

送張子方之江西掾史

自脫京華服知君嘆索居海隅清官在天上故人殊掛

壁空長劍探囊得素書更陪驄馬去西望復何如

和德安允恭韻

亂離傷別久愁病入新年行旆驚戎幕殘經罷講筵山
河空有恨桃李漫爭妍馬首春風裡期君早著鞭

重到龍泉寺有懷秋谷上人

舊日經行處重來倍寂寥諸天燈并：一徑兩蕭：一
辭經春合臺花逐夜飄不知飛錫處惆悵采蘭苕

留別古心淳上人

白社交游少唯公即舊知機關同嗜酒趣合共耽詩淪
落三生話蒼茫百歲期空持匣中劍日暮竟何之

山居春暮偶成

水氣掩蒼扉，蘿香織翠微。洞迴雲到少，地僻客來稀。野鳥傷春去，揚花作雪飛。祇因飄泊久，對此也沾衣。

遊枕煙寺

石磴招提古，松蘿暝不分。排雲雙樹轉，隔水一鐘聞。林影疑殘雨，山光倚夕曛。醉來歸路遠，秋思正紛紛。

故人遂初過山居

秋氣誰相問，荒居懶閉門。劍歌雙鬢換，國步寸心存。漫寫當年事，偏驚此日魂。風流非舊日，有蟲對誰捫。

題畫寄會稽胡溫

秋聲無遠近，隱處入雙松。落景明寒渚，虛煙暝遠峰。孤舟清夜笛，何處暮天鐘。不識山陰路，蒼茫翠幾重。

夜宿洪塘舟中次劉子中韻

勝地標孤塔，遙津集百舩。岸迴孤嶼火，風度隔村烟。樹色迷芳渚，漁歌起暮天。客愁無處寫，相對未成眠。

山房秋夜寄魯客

寂莫山居悄，相思望轉迷。江空寒雁落，樹盡暮雲低。生事悲秋艸，交情憶剡溪。西齋愁不寐，風雨共凄凄。

江上醉歸

江邊日，醉應被野鷗。猜潦倒依芳艸，猖狂藉綠苔。杜陵非嗜酒，彭澤豈耽杯。近是飄零客，愁懷強自開。

聞性空居士病愈

聞訊維摩室，秋深病稍除。翻經仍傍暖，補衲乍臨虛。寂

冥思聞楚睽離嘆索居西來同逝水不肯寄雙魚

題畫小景

萬籟秋聲近雙峰宿靄收江涵林影碎野接曙光浮
薜迤書幌鶯花避釣舟由來楊子宅寂寞閑丹丘

到家

冒雨離家去今朝江上回妻兒憐我醉懷抱為誰開山
谷多豺虎田園半草萊生涯無可問不惜坐蒼苔

龍湖夜泊

小舟眠不得起坐待潮生露淺壺觴盡江澄中屢清泠
沙餘鳥跡隔水通鐘聲悄似金山夜相看月正明

春日客至

日暮滄江上收綸坐石磯為憐霄漢客暫解薜蘿衣雨
過苔初合雲深蕨正肥相看俱白首誰道故人稀

春暮約魯客游雁湖

桂樹淮南隱絨書喜見招幾年悲落魂今日任逍遙擢
秀名空在舉芳趣轉饒也知簪組累不似學魚樵

輓古心淳上人

飲盡杯中物西游竟不歸孤墳誰掛劍老淚獨沾衣夜
月疑禪幻春雲想錫飛東林詩社在寂寞似君稀

游鼓山靈源洞時澄明景霽入望千里徘徊自旦

至夕值月上聞梵聲冷然有出塵之想

旭日照高岑天風振遠林不應滄海色那識白雲心寶

樹空香滿珠林積翠深坐來明月上何處起潮音

晚眺次林公偉韻

偶信東山屐尋幽到翠微白雲空野樹紅葉懸斜暉岸
落潮初滿天寒雁未歸風塵江海徧不上野人衣
送心泉疑上人游方

不住孤雲跡茫茫萬里程澄心窺妙道棲幻抱幽情錫
度秋應盡經餘月正明諸天泰禮遍石上問三生

秋懷次韻

解印歸來晚茆齋病未除窮愁隣桂樹歸興託鱸魚久
歷羊腸險難通雁足書秋風正蕭索不似故園居

顯怪石圖贈異上人

靈山一片石蒼莽起秋聲願以中流險能同砥柱平色
憐蒼蘚合根帶白雲生終日頭空點誰能辨爾情

懷雲卧軒上人

江上一為別令人長憶君碧虛燈影送清籟梵聲聞月
落林扉靜潮迴島嶼分何時高閣上對卧碧山雲

九日客揚隄

揚隄逢九日寂寞倍思家俗士不鮮飲濁醪何處賒空
山悲落帽短髻懶簪花不見南來雁新愁未有涯

五言排律

重陽後寄林君佐

秋度重陽盡寒隨夜雨來菊荒陶令宅雲暗越王臺戰

伐行人苦誅求寡婦哀濟時無上策尸位愧庸才北去
瞻天遠南游指日迴客愁長自寫鄉思不堪裁海上雲
千疊生前酒一杯相思存潦倒遠別漫徘徊佇看凌霄
翮春風到上台

輓邊懶道人

四明邊道士狂似賀知章結客游千里看花醉百場越
談多慷慨楚舞獨倡佯翰墨南宮趣襟期北海鄉看雲
時並屐賞酒每探囊蕙佩青山影芹羹碧澗香交情期
管鮑人事等參商入望迷雲樹相思見月梁三生空指
日兩鬢各成霜百粵清游地懷君一斷腸

輓胡尊道温

我憶酒中仙吟詩動百篇杯多天不惜名在世空傳已
闕招陶社空迴訪戴船踈狂誰得似索莫竟堪憐踪跡
江湖滿交游歲序遷辭家頻萬里作客向經年病卧滄
江上魂飛瘴海邊悲歌臨舊業衰影隔重泉有母存鄉
曲無兒歸墓田平生於我厚遠沒賴誰全舊事驚殘夢
新阡已斷煙逝川何日返那得不潸然

七言律詩

聞大軍渡淮

挾策南游已十年夢魂幾度拜幽燕王師近報清淮甸
羽檄今當到海壖妖氣蒼茫空獨恨生民樵悴竟誰憐
廟堂早定匡時策我亦歸耕粟里田

夜雨

官舍人稀夜雨初
踈燈相對竟何如
乾坤迢遞干戈滿
煙火蕭條里社虛
報國每慚孫武策
匡時空草賈生書
手持漢節歸何日
北望神京萬里餘

懷秋谷肅上人

我把一麾江海去
上人隻履竟西歸
三生寂寞煙霞淡
雙樹飄零故舊稀
季扎有懷空挂劍
火顛無處更留衣
纍、荒塚悲風裏
淚洒空山送夕暉

過化劍津有感

寶劍沉沙世已傾
千年波浪未能平
空餘故壘隣滄島
那復雄兵出郡城
淮上何人祠許遠
海中無客葬田橫

夜溪有氣干牛斗
洒淚空含萬古情

山君喜劉子中見過

幾年江海厭風波
千里雲林竟若何
為喜故人深赴約
不辭此日遠相過
鳥啼芳徑春應盡
花落名園草漸多
世事紛紛那可問
與君對酒且高歌

次子中韻

遙憶韓山登覽處
故人離別動經年
南游似入三湘道
北上空瞻萬里天
花徑春風聯袂出
郡城夜雨促燈眠
夜來獨上高樓望
劍氣蒼々北斗邊

會故人程民同

憶昔交游多感慨
別來世事幾浮沉
王弘不識淵明趣

鮑林能知管仲心
江海有懷悲故國
風塵無處問歸音
相看日暮東流水
白髮羞為梁父吟

寄別劉子中

問君西去與誰親
吳楚山川滿目新
賈傅有才終大用
杜陵無計豈長貧
鳳凰臺古思明月
采石江空夢白蘋
幾欲西風斟別酒
不堪零露滿衣巾

游雁湖

雁去湖空野水深
秋風吹客上遙岑
丹楓盡逐孤臣淚
黃菊空憐處士心
雨後諸峰浮夕靄
霜前一葉送寒陰
停車欲問當年事
尺素何由到上林
江海風波浩不收
却來此地駐清游
上方樓閣通三島

別墅煙霞卜一丘
書斷雁歸沙塞遠
丹成龍去鼎湖秋
悠々此意憑誰問
陳跡空餘萬古愁

寄陳仲實

一徑荒蕪幾負秋
異鄉書劍尚淹留
陶潛解印投閑去
阮籍耽杯盡醉休
歲月東來空冉冉
江山北望自悠悠
劍歌無那相思處
滿目風塵倦倚樓

和馬子英見寄韻

十年流落向炎州
判與劉伶作醉游
望國孤忠徒自憤
持身直道更何求
浮雲往事驚春夢
落日窮途起暮愁
賴有故人相憶在
徧頭尺牘海西頭

和魯客見寄韻

故人相約碧溪行
風雨何期別恨生
遠樹白波孤棹沒
空林黃葉宿寒輕
謝公獨得東山趣
鄭子應慚谷口耕
安得手杯同潦倒
遠尋遙草到蓬瀛

春日雨中即事

京洛繁華事已違
懷人竟日掩空扉
望迷楚岫聞啼鴉
思入秦州怨落暉
野館蕭條芳艸合
寒江寂寞暮雲飛
落花片、隨流水
惆悵閔河淚滿衣

立春日有感

故國棲遲去路難
園林此日又冬殘
天涯往事書難寄
客裡新愁淚未乾
臘雪漸隨芳草變
東風猶笑布袍單
堤邊楊柳開青眼
肯傍梅花共歲寒

春日遂初居貞見訪

東風吹雪正紛紛
江上離居欲斷魂
白髮故人緣草徑
錦袍公子款蓬門
淒涼久負東山屐
牢落須傾北海樽
相對不堪悲往事
渡頭燈火送黃昏

秋暮會古心上人

遠公與我雲間別
幾度西風海上秋
白髮時來還自笑
青山歸去與誰游
薜蘿久負孤燈夢
猿窟應同雨地愁
相對空林今夜月
清光遲爾少淹留

輓子中劉別駕

劉君自是南州彥
嗜酒吟詩興獨狂
不以長鯨浮采石
却緣孤雁沒蠻鄉
經綸事業誰堪擬
金石交情我最傷

料爾賢郎多少恨，獨收遺骨返衡湘。
五言絕句

晚宿陽隄舟中懷魯客

螢度星依草，鷗來雪滿汀。故人不可見，天際亂山青。

題邊道人小景

扁舟湘浦外，茆屋輞川西。舟中春將暮，滄洲杜若齊。

題溪山風雨圖

紫壑秋聲滿，滄洲野水深。孤蓬何處客，相對共沉沉。

題風竹

月色不可埽，秋聲何處聞。不應仙珮集，翠影亂紛紛。

七言絕句

送顏子中使廣州

使君捧檄度南閩，遠布天威廣海間。為問故人孫內史，

翩翩劍珮幾時還。

題畫葵花

上苑餘春輦路荒，芳菲落盡更堪傷。憐渠自是無情物，

猶解傾心向太陽。

寄蔡司合

十年海上舊郎官，白髮相期歲欲闌。處處風塵猶在日，

歸來何日共綸竿。

別後升沉事幾多，故人心事竟如何。落花啼鳥春無賴，

莫遣風光笑薜蘿。

新春寄魯客

雪後梅花幾樹開
故人忘却剡溪來
東風獨倚孤舟興
芳草青々送酒杯

題邊道士小景二首

碧松陰底大江邊
兩岸猿聲更悄然
落日亂雲迷遠近
無心重理釣魚船

前山漠々水迢々
却倚朱絃思寐寒
鳳鳥不來春已暮
望將一曲寄虞韶

題敗荷

曾向西湖載酒歸
香風十里弄晴暉
芳菲今日凋零盡
却送秋聲到客衣

和吳升甫見寄韻二首

楚澤蒼茫帶夕暉
暫投簪珮上苔磯
孤雲不解離情苦
猶自紛紛上客衣

短籬黃菊正蒼々
客路西風兩鬢霜
誰信義熙年後筆
獨能千古弔餘芳

送陳仲實還潮陽

十年海上賦離歌
今日臨歧奈別何
歸去故人如有問
春山從此蕨薇多

題雲松野岸

遠山積翠白雲多
揚子幽居隱薜蘿
一徑松陰春寂々
朝來載酒幾人過

九日寄魯客

黃花錦樹碧江濱
笑把萸杯獨憶君
日暮西風還落帽
風流那似孟參軍

寄方中上人

竹徑柴扉客過稀
落紅滿地綠依依
懷人獨立滄江上
幾度扁舟興盡歸

次居貞見寄韻

君去溪山趣亦稀
晚來空翠正霏霏
多情只有梅花樹
滿路清香送客歸

題画山水

野菊蕭蕭一徑深
茆齋低結小山陰
楓林又逐秋風老

惟有孤雲似客心

友石山人遺藁終

附錄

友石山人墓誌銘

閩郡吳海撰

歲著雍敦祥二月乙丑友石山人王君用六卒予走哭
焉其孤曰父有遺言令我自進啟緘得書及詩皆殷勤
與余訣與其後事其辭有甚可哀者曰吾幼失父母值
亂奔走四方來閩將二十年淮土為墟吾家老幼童僕
殆百口今無一人存焉先隴遂為無主吾自不能瞑諸
子皆幼何以得還將來失學不能為人吾葬不必擇地
苟夫子不忘平生其幸為我誌之余既弔撫其孤乃徵
其家牒按王氏先世齊人隔沒於李元昊元初有天下
賜姓唐兀氏曾祖集從下江淮有軍功授武德將軍領

兵上千戶鎮廬州家焉祖某父某迨君襲封三世君諱
翰仕名那木罕年十六領所部有能聲有憲共言其才
於上請畀民職除廬州路治中政譽日起燕赤不花鎮
閩辟為從事改福州路治中三魁賊起地險猝難用兵
制君自造其壘諭降之并同知又并理問官綜理羅源
永福三縣泉州土帥柳莽跋扈越境以聯衆莆屬邑皆
受團結既而遂向永福民懼洵君使人謂曰彼此王
民各有定屬慎毋犯我尺寸我有以待汝矣莽遽退不
敢前他為好辭以應擢朝列大夫江西福建行省郎中
平章陳公留居幕府每有匡益然敬而憚之南方屢憂
以君威望素著表授潮州路總管兼督循梅惠二州君

請勿拘文法至則大布恩信已逋責緩徭賦簡刑罰事
有害政者以便宜罷之興學校禮儒生使民知好惡革
其舊習好兇宿孽不能扇亂服順若良民遭世變更浮
海抵交占不果屏居永福山中為黃冠服十年號友石
山人一妾男子上書薦之君聞命下嘆曰女豈可更適
人哉即治木病不肯服藥逮有司逼就道遂自引決年
四十有六君性強介精敏有膽略常慕古志士立名於
世持身斬、刻苦節儉衣服飲食處人不堪居官廉潔
貨賂不入吏畏若雷霆其行事一以愛民為主平居閱
書史喜為詩敏常先於人君配夏氏前卒於再娶劉氏
子三人偁甫九歲修六歲偉三歲君方沒時劉氏亦手

办自裁為家人所奪乃歸擗不食積六日不死其可憫
哉嗚呼世之仕者不能潔已愛人或下才不任舉職徒
能邂逅一死君子猶必取之况君所樹立若此者哉但
寡妻弱子僑寓於數千里之外望鄉井墳墓而不可及
行道有戚之者遂買地於永福縣永唐里林坑山之原
卜葬用十有二月甲寅銘曰
松栢受命天也持太阿淬鋒孰與隔中道而棄世既易
知死可畏子乃擇自獻自靖作臣式有其訊之視此刻

友石先生傳

吳海

先生羈人也不知其姓名宦游南方遭世變易屏居遠
迹栖止於龍果之上籜冠卉服葛履繩帶與樵童牧豎

田夫漁父襟處沙門法雖不甚解然時往來聽其談論
性簡易喜讀書吟詩飲酒酷有山水癖四時朝昏不問
寒暑曳杖入幽林溪谷攀高崖絕壁覽飛流潺湲每遇
石處必坐、則吐、肯首自語嘯歌盤桓或解衣而卧
既去復返春戀不忍舍雖日遇百石率用為常戶外有
盤陀陰雨不能出則倚戶佇玩清夜月出必就與躡踞
俯仰或賦詩一篇奏琴一曲然後引杯孤酌陶然至醉
不知天地之大古今之變身世之無何日月之不足也
故凡龍泉之上目以為異人或問曰先生若是其愛石
者石豈有聲色臭味之可悅而愛之若是是將與之友
乎先生曰是固然夫天下之物皆有可嗜而人各有所

嗜嗜不同者不可與共語也何獨是乎無聲色臭味乎
聲色臭味果能使人樂而忘死哉吾聞五色令人目盲
五音令人耳聾五臭令人鼻亂五味令人口爽使我好
之其如害何乎若石乃獨與我性合故愛之自吾之愛
之也聽之過絲竹觀之逾丹青逆之溢椒蘭甘之越芻
豢石雖不言而以其形喻終日與我若相唯諾者而又
不吾裒吾奚為不愛之哉且吾之耳目口鼻已與石化
矣而吾心則又久然矣而吾與為友又何間焉問者無
以復由是衆咸稱之友石先生云

王山人哀辭

吳海

物之生必有死兮天命固然死者不可復生兮故死為

人之所難仁者殺身以成仁兮義者忘軀而殉義彼甘
之若芻豢兮棄餘生猶唾涕偉哉子之耿介兮既任直
又信脩思古人以自範兮覩時俗與沉浮艱難險阻之
備嘗兮盤錯亦云其屢試攄所懷之未竟兮山河儵而
頓改退靜伏以默兮閱天星之既終何鵠板之搜賢
兮空藪澤而不容撫今昔之異時兮中激烈而慷慨謂
女子之事人兮尤且從一而無二吾豈夫之不若兮曾
不顧夫廉恥吾亦焉用此生為兮遂引決而永逝山雲
淒其動色兮溪雨愴而增悲松嗟栢怨蘭桂惋兮白鶴
噉而玄猿啼彼負義而偷息兮羌不失其富貴此秉節
而不渝兮乃獨得顛賴維綱常之在世兮如日月之行

天子自擇死兮寧不為賢嗚呼國安有鬼兮相見乎下泉

送王潮州序

吳海

予少負意氣自謂天下無難事及壯見世之仕者多不稱且云某地難治某事難集竊疑焉既又有能者乃知人之才不相逮而居官以營私者衆也迨夫馬齒衰矣觀古人益多閱世故益深乃知天下時有不可為之時耳而事實無難者顧難得其人也河西王君用文劉直明快遇事剖決權勢不能奪人以為難者君處之有餘總治永福羅源吏畏之若神明民戴之猶父母此去菴倪蔽道垂涕而不可留君何以致人若是哉由其存心

也公律已也嚴愛民也誠若苞苴內謁不行而奸欺屏息強便馴化利之所在知之必與民興之害之所伏知之必與民除之致焉惟懼其政之僻而又和易可近故民疾痛輒聞凡八閩蹤跡未常至者莫不慕焉分省陳公辟居幕府每有所費翊既而邊陲多擾非劉明仁恕之材不足以鎮之以郎中出守潮州兼督循梅惠三州任固重矣四州之民幸矣然陳公遠一良佐豈不甚可惜哉君行過予別請曰先生何以教我予曰德則君有之惠則民賴之譽則四方聞焉然予得無贈乎夫為山者在乎積土石也不欲崇朽壤為川者在乎納泉流也不欲涵汙惡君子為政在任賢才也不欲雜小人自

古君子少而小人多小人情偽百端其入人也易將覺之也難宋韓魏公號稱賢相或者猶謂其明於知君子暗於別小人君其慎諸

王氏家譜序

吳海

河西古諸羌漢武帝時始置郡後擊逐而空其地徙之漢人實之唐肅宗起靈武悉召其兵赴難乘間為吐蕃所吞後張義朝發鄆兵二千餘人往戍河西之有中國人以此周廣順間申師厚為河西節度使用王庭翰等為將益中國人子孫也宋朝李元昊據之為邊患寶元庸定相繼用兵士有陷沒者逮中原為金所併不能自還遂為夏人元初得天下惟河西累年不服最後乃服世

祖以其人剛直守義嘉之賜姓唐兀氏俾附國籍次蒙古一等其俗自別舊羌為蕃河西陷沒人為漢河西而任官者皆舍舊氏用新氏國家尚寬厚雖占舊氏不禁然能存者僅一二數若今福建江西行省郎中王君翰先世齊人沒元昊者其宗族在東阿陽穀甚盛國初附屬時其高祖即復歸山東沒從其族葬陽穀曾祖從右丞昂吉下江淮以功授武德將軍領軍千戶鎮廬州迄今又三世墳墓皆在廬迨君襲職乃冠舊氏名上一日出家譜相示予觀其自曾祖以來皆著私名而以河西名綴其意謂新氏乃天子所命而不敢違舊氏乃祖宗所得而不可棄故兼錄之所以尊君而重祖也憶世薄

俗漓人惟功利之趨而不顧其本固有自毀其祖而冒國籍以求仕之顯者安有既受賜姓猶不忍舍其舊乎吾閱是譜不覺為之感嘆况其後世子孫能以祖宗為心者乎推此心也以往孝在是也忠在是也節義可為也功業可成也彼自棄其祖者使得觀是譜而能動心悔焉庶亦可改也是譜益足為世勸也

故王將軍夫人孫氏墓誌銘

吳海

故武德將軍王也先不華其配孫氏卒於家其子福建江西行省郎中行潮州路總管那木翰泣請於其所游吳海曰翰不幸生五歲而母夫人夏氏見背賴繼母孫氏夫人鞠育恩意隆重如已自出幼復多病貽夫人憂

先將軍沒夫人刻苦持植門戶翰甫受學夫人即語以立節槩建功業顯親揚名稍長襲父職西夫人訓益勤惟是孜、奉承不怠臺省薦辟理郡撫邊至於今獲免於戾以不墜先緒伊母力也又曰翰幼不省聞家媪言夏夫人性嚴厲治家如治官府孫夫人寬裕和愛專務以恩撫人宗屬親睦家始貧夫人勤蠶績以給衣服下逮卑賤凡飲食衣服大小必均僮僕常有罪夫人不加怒而善喻之再三後竟無犯者又曰昔吾父沒賴夫人獲以時葬從先祖之域及翰從事於外十有六年世多變故道不得道溫清之問時闕比鄉人來云夫人沒已久嗚呼痛哉翰昔孤露時生死未可知賴夫人有今日

夫人待翰以終老而翰不及養念此大員何以為子哉夫
人生有淋德其婦儀母範表稱一鄉其有功王氏甚
大然生不蒙夫之榮享子之奉遭時喪亂又不完於壽
以沒婦將合祔於先將軍先夫人之兆吾子其幸昇之
銘以與金石長久庶幾逭翰不孝之罪言已益泣不已
海悲其意不能終辭遂因其語而次第之按王將軍家
世河西元初領兵鎮廬州因以為家墳墓三世皆在廬
州先夫人夏氏封合肥縣君夏氏由宋太保貴以來為
州顯姓夫人合肥人年若干來嬪將軍不三年而寡夫
人無丈夫子所生二女子夫人卒五十有幾海惟婦人
之德不外知觀翰之好善篤學居官疑々正直不阿而

仁愛惠下知其教之有自也古今母教者多如王陵范
滂陸績陶侃皆由賢母以就德業流聞於後世若孫夫
人可不謂賢哉銘曰

坤道至靜順裕而純懿哉夫人其德淑溫來嬪未幾乃
殞厥天介々獨立躬勤志堅教子能政休聞載宣不待
於養胡嗇於年勤銘幽墟來者其傳

友石山人真贊

吳海

油然春雨之心肅然秋霜之氣驚切獨擊冥鴻高逝昔
時皂蓋朱幡今日麻袍草履此山之巔彼水之涘長吟
獨行與石為友

謁玉用文祠

徐勣

孤臣誓與國存亡，猶有芳祠寄水陽。
匣裡芙蓉秋嘯雨，樹頭杜宇夜啼霜。
古今過客尋遺墨，伏臘雲孫薦甲香。
故老尚能談往事，庭前片石獨蒼蒼。

觀獵山謁王用文祠

謝肇淛

迴合溪山暮靄凝，孤臣遺廟肅香燈。
春魂已化啼鵑血，故里猶傳下馬陵。
萬壑松楸淒雨露，四時蘋藻薦雲仍。
乾坤有立菟裘在，淚洒西風感廢興。

謁王用文先生祠

陳鳴鶴

山深日暮弔荒祠，獨有遺魂怨子規。
血濺辟書酬故主，劍埋荒塚貴明時。
朔方萬里歸殘夢，永泰千峰寄一枝。
樵往逢人尋舊蹟，松楸零落草離離。

過王總管故居

陳薦夫

龍湖西去一荒村，滿目荆榛逸敗垣。
勝國河山非故主，明時溝瀆有忠魂。
桃源豈識秦頌朔，粟里終無宋紀元。
今日相過誰舊侶，數聲隣笛叫霜猿。

跋

先府君平昔喜作詩晚年隱遯林壑尤必以此自娛故
凡其觸物感事流連光景一寓於詩以舒其抑鬱之懷
以發其憤惋之氣其作頗多第以家不蓄藁偁自悼年
為所背棄不能一舉成篇比自有知以來始於耆老故
舊之聞掇拾遺篇粗得以上若干首類成卷帙用敢示
之子孫是雖不能盡得其詳而其志節大略亦於此焉
見耳嗚呼為子孫者苟能因其詞而知其心則亦庶乎
凜然思以繼承於不墜哉歲上章敦泮孟春初吉孤
子偁謹書

列朝詩集小序

王總管翰字用文靈武人先世齊人陷於元吳元初從
下江淮授領兵千戶賜姓唐兀氏鎮廬州家焉翰襲爵
仕名那木罕年十六領所部有能名除廬州府治中陞
同知又陞理問官理永福羅源二縣拒泉州土師柳莽
四境又安擢福建江西行省郎中陳友定留居幕府每
有匡益教而憚之表授潮州路總管兼督循梅惠二州
友定敗浮海抵交趾界隱居永福縣東之觀獵山屏跡
為黃冠服十年辟書再至語其家人曰吾所以不死者
為無後也今有三男子得死所矣長子偁才九歲屬其
友人吳海賦詩見志遂自引決以洪武戊午之二月也

年四十有六僱仕永樂中為名臣以譴死海宇朝宗扁
其齋曰聞過學者稱為聞過夫子元亡隱居不出卒于
洪武末年為文但書甲子為翰墓誌書其沒之歲曰著
雍敦辨以自寓云

聞過



